

Signurs territorials dal temp autmedieval

Part 1: Dominis ecclesiastics e seculars en survista

■ Fin enturn il 1300 è la tipica furma autmedievala dal domini (suveran) aristocratic sa mantegnida quasi integralmain. Quest domini s'orientava a persunas e gruppas da persunas e deva pauc paisa a la cumpactadad spaziala e materiala dals possess e dals dretgs. L'uestg da Cuira, la noblezza auta e las claustras han dà enturn il 1350 era en la Currezia la tempra ad ina cuntrada signurila multifara.

Dominis territorials ecclesiastics

Dominis ecclesiastics (era stadis ecclesiastics) èn dominis seculars sutta mess a la suveranità da potentats ecclesiastics sco prinzi-avats, prinzi-uestgs u chapitels catedrali. Per obtegnair il sustegn da l'episcopat e da las claustras emprestavan ils retgs en il temp medieval (feudal) territoris, privilegis e dretgs suverans seculars al clerus superiu, prendevan dentant influenza en l'occupaziun dals uffizis ecclesiastics. Caratteristic per ils dominis territorials ecclesiastics era la posiziun dubla dal prinzi-uestg u dal prinzi-avat sco signur territorial d'in stan imperial secular (che sutta steva directamain a l'imperatur) e sco titular d'in uffizi spiritual, sutta mess al papa. Sco prinzi imperials avevan els in sez ed ina vusch al Reichstag. L'organ electoral da l'uestg (e cun quai era dal prinzi-uestg) era il chapitel catedral; ils avats (respectivamain ils prinzi-avats) vegnivan elegids dals convents. En la Currezia avevan gia ils Zaccons/Victorids exequi la pussanza ecclesiastica e seculara fin a la separaziun da quellas l'onn 806 (uschenumnada Divisio). La politica per la supremazia sur ils pass alpini, proseguida dals imperaturs germans, constituiva la basa territoriala dals dominis territorials ecclesiastics durant il temp autmedieval ed il temp medieval tardiv. L'imperatur Otto I (962–73) aveva privilegià l'uestg Hartpert (en uffizi ca. 951–971/72) surtut a l'intern da la citad da Cuira ed en la Bergiaglia, stgafind qua tras las premissas per la posiziun dominanta dals uestgs da Cuira sco signurs feudals e prinzi imperials, incumbensads da controllair ils pass en la Lombardia. Numerusas donaziuns aveva Otto I era fatg a la claustra da Mustér; Friedrich I Barbarossa (imperatur 1152–90) aveva francà il domini claustral sur la Cadi tranter Breil ed il Furca ed engrondi il possess claustral tranter il Lucmagn e la Lombardia, rinforzond qua tras sia posiziun (e quella da la claustra) en quella regiun da passadi alpina. La claustra da Faveras possedeve en il temp autmedieval bains e pitschens dominis al Spleia ed a Casaccia sco era lung la ruta al Lai Rivaun ed al Lai da Constanza. Avugads claustrals aristocratici e vischnancas da valladas han fatg svanir ils dominis territorials ecclesiastics (per exempel la Lia Gri-

scha quel da la claustra sur la Cadi ed ils Confederads quel da Faveras) ed ils burgais da Cuira èn sa liberads anc en il temp medieval tardiv da la suveranità da lur patrums spirituals. L'uestg da Cuira e l'avat da Mustér han pers formalmain lur dominis seculars tras ils Artitgels da Glion dal 1524 e 1526 (cumprads ora dals pertutgads en il decurs dal temp sequent). En il 18avel tschientaner è stada mo pli la Curt episcopala a Cuira in dominis ecclesiastic en il Grischun (fin il 1803/52) e l'uestgieu possedeve anc dretgs suverans sparpagliads en la Tumleasta ed en il Vnuost (fin a la helvetica). Il prinzi-uestg ha accumulà anc fin a la helvetica ses duairs imperials. *Marco Jorio*

Avugadia ecclesiastica

En il dretg feudal era l'avugà ecclesiastic (latin advocatus) in laic incumbensà da defender ils interess seculars d'ina abazia u d'in chapitel. Il term tudestg correspondent, Kast(en)vogt, cumpara oriundamain en las funtaunas da l'intschess alemanic-svabais, per l'emprima giada il 1130 (diplom dal retg Lotar III, transcripziun dal 15avel tschientaner), ma spezialmain en il temp medieval tardiv, cura ch'ìls novs signurs territorials, titulars da questa funcziun, revenditgavan il dretg da proteger e survegliar abazias e chapitels catedrali. Quai als permetteva d'intervignir en la gestiun economica da las instituziuns ecclesiasticas (il term tudestg Kasten signifitga graner), da controllar la giurisdicziun che quellas possedevan e da represchentar las instituziuns sezzas vers l'exteriur e davant dretgira, obtegnend per recompensa entradas da l'avugadia ecclesiastica. En il temp medieval tardiv è l'avugadia ecclesiastica passada dals signurs feudals a las vischnancas u als cumins – quella da la claustra da Mustér per exempel al cumin da la Cadi (1401), quella da l'uestgieu da Cuira a la Lia da la Chadé (1409). *Adolf Collenberg*

Subdits ecclesiastics

Glieud sutta messa en il temp medieval al domini feudal d'in uestg u d'ina claustra (tudestg Gotteshausleute). Questa submissiun valeva sco main rigorosa che quella a signurs feudals seculars.

Subdits da l'uestg da Cuira

Ils subdits da l'uestg da Cuira han existì oravant tut là, nua che l'uestg exequiva la suveranità territoriala e la giurisdicziun, per exempel en la Tumleasta ed en l'Engiadin'Ota. Ils subdits ecclesiastics da tals dominis cumpigliavan ils libers, ils nobels ed ils ministerials, plinavant ils libers dal terz stan (libers per semper, quadraris e quartanis), ils colons ed il servs. Subdits ecclesiastics devi ultra da quai era là nua ch'in signur feudal



Ils abitants da la Cadi (Casa Dei = Chasa da Dieu) eran subdits da la claustra da Mustér.

FOTO: JOUJOU/PIXELIO

secular (da noblezza) exequiva la suveranità territoriala, per exempel en la Surselva Centrala, en il Partenz ed en l'Engiadina Bassa. En quels cas sa cumponeva la gruppa da subdits ecclesiastics mo da colons e da servs. Ils libers pajavan a l'uestg tschains collectifs (anteriurs tschains roials), che pudevan era vegnir cumpensads cun servetschs, e prestavan per part era servetsch militar en favur da l'uestgieu. Ils da Scharons, Tràn e Tumegl per exempel han prestà enturn il 1400 servetschs en connex cun la construcziun ed il mantegniment da la punt sur l'Alvra a Farschno, ils dal Partenz e da la Surselva pajavan lur tschains en furma da natirialis (bagiaunas/favas). Ils colons percenter stuevan pajar ina dieschma en furma da fritga u da biestga. Las submissiuns e las cundiziuns èn sa midadas permanentamain durant il temp medieval ed en tschertas regiuns han existì relaziuns da submissiun ordvart cumplitgadas, per exempel en l'Engiadina Bassa, nua ch'ìls libers ed ina part dals colons e servs eran sutta mess enturn il 1400 al cont dal Tirol (decasteri sin il chastè da Danuder), entant che la plipart dals colons e servs appartegniva a l'uestgieu e giudeva ina gronda autonomia economica. Ils subdits da l'uestg, domiciliads tranter la Punt Ota (cunfin istoric-politic tranter l'Engiadin'Ota e l'Engiadina Bassa) e Martina, avevan in agenderschader civil a Sur e Suot Tasna.

Subdits da las claustras da Mustér e Müstair

Als subdits da questas claustras han appartegnì en fin als Artitgels da Glion dal 1524 e 1526 ils libers, ils colons ed ils servs ch'han dentant obtegnì gia baud dretgs da cundecisiun. Ils subdits da la Cadi (casa Dei/claustra da Mustér) cumparan gia il 1285 cun in'atgna vopna ed il 1371 cun in'emprim mastral. Cun ils cunalliads da la Lia Grischa han els exequi dapi il 1424 la legislativa civila. Ils subdits episcopals dals Quatter Vitgs percenter han disponi d'atgnas leschas matrimonialas pir dapi il 1516 e d'ina atgna vopna pir dapi il 1527.

Martin Bundi

Noblezza auta dal temp autmedieval

Dominants eran dal temp autmedieval, sper l'uestg da Cuira, ils Toggenburgs e Matschs, ils conts de Werdenberg-Sargans (sco ertavels dals signurs de Vaz) ed ils baruns de Razén. Las differents lingias dals signurs de Sax eran represchentadas l'emprim mo en il Mesauc ed en la Val dal Rain Songagliaisa. En l'Engiadina Bassa ed en il Vnuost giugavan ils conts von Tirol ina rolla decisiva cun lur dretgs e possess (fin il 1363). Ils ducas d'Austria (Habsburgais), daventads pli tard influents, eran percenter anc pauc preschents sco suverans territorials en Rezia enturn il 1350 (quai è sa midà suenter il 1363); il medem vala era per ils conts de Bel-


mont ed ils de Werdenberg-Heiligenberg.

Ina raìt da relaziuns surregiunals n'era per ils possessurs da dominis retics betg mo impurtanta per motivs dinastics ed economics. L'auta noblezza da la gruppa dals nobles autmedievala (auta aristocrazia da derivanza libra) retirava ina part essenziala da la legitimaziun da ses domini d'ina vischnanza anteriura u actuala cun il retg/imperatur.

L'organisaziun politica en il territori grischun era caracterisada da principi tras in urden feudal, betg auter ch'en tut la societad europeica da quel temp. Purtaders nobels da dominis seculars ed ecclesiastics exercitavan la pussanza e la suveranità sur ina puraglia pli u main dependenta. Ils urdens feudals e las furmas da la pratica signurila correladas eran sutta messas a fermes midaments. La suveranità territoriala e la chastellania furmavan ils fundamenti per mintga domini aristocratic autmedieval. Omaduas furmas da domini han subì en il temp medieval tardiv ina midada decisiva. Il domini feudal, che colliava en il temp autmedieval il dretg da disponer da terren utilisabel, unì inseparablmain cun ils dretgs (giudizials e.a.) sur da persunas residentas sin quel, è alura sa dividi en differents champs, en ils quals ils dretgs funsils, giudizials e da persuna èn sa svilupads mintgamai a moda autonoma. Ils dretgs da terren e fund èn vegnids objectivads en il temp medieval tardiv e transformads en rentas impersonals, pajadas en daners e martgadadas libramain. Il declin economic, mortoris durant guerras e l'extincziun da dinastias han provocà ina viva fluctuaziun en il patriziat. Mo excepziunmain pudevan famiglias mantegnair lur status per pliras generaziuns. *Adolf Collenberg*



Sco territori sutta mess a l'uestg da Cuira è l'Engiadin'Ota ida politicamain sur lung temp in'otra via che l'Engiadina Bassa.



Vopnas dals signurs de Sax e de Vaz.

Lexicon Istoric Retic

Il LIR cumpiglia bundant 3100 artitgels (geografics, tematics, artitgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.